



MALAYSIA

PENYATA RASMI PARLIMEN

Parliamentary Debates

KAMAR KHAS

Special Chamber

**PARLIMEN KEEMPAT BELAS
PENGAL KEEMPAT
MESYUARAT PERTAMA**

K A N D U N G A N

UCAPAN DI BAWAH USUL BERKENAAN PERKARA TADBIR KERAJAAN [P.M. 17]:

- **Perubahan Kriteria Program MM2H**
- *YB. Tuan Chan Ming Kai (Alor Setar)* (Halaman 1)
- **Peruntukan untuk Pembangunan dan Naik Taraf
Hospital Besar Pulau Pinang**
- *YB. Tuan Wong Hon Wai (Bukit Bendera)* (Halaman 4)

MALAYSIA
KAMAR KHAS
PARLIMEN KEEMPAT BELAS
PENGGAL KEEMPAT
MESYUARAT PERTAMA
Rabu, 22 September 2021
Mesyuarat dimulakan pada pukul 2.30 petang
DOA

*[Timbalan Yang di-Pertua (Dato' Mohd Rashid Hasnon)
mempengerusikan Mesyuarat]*

UCAPAN DI BAWAH USUL
BERKENAAN PERKARA TADBIR KERAJAAN (P.M. 17)

Perubahan Kriteria Program MM2H

2.34 ptg.

Tuan Chan Ming Kai [Alor Setar]: Yang Berhormat Tuan Yang di-Pertua, Yang Berhormat Menteri, saya ingin menarik perhatian pihak kementerian ke atas masalah perubahan kriteria bagi Program MM2H yang telah diaktifkan semula selepas dihentikan setahun. Untuk makluman Menteri, pengumuman terkini berkenaan perubahan kriteria bagi Program MM2H telah mencetus kontroversi kerana perubahan tersebut turut memberi kesan kepada golongan komuniti MM2H yang memang sudah berada di Malaysia bertahun-tahun.

Untuk makluman Yang Berhormat Menteri, perubahan syarat seperti pendapatan minima meningkat dari RM10,000 kepada RM40,000 dan peningkatan simpanan tetap RM300,000 dan aset RM500,000 kepada RM 1 juta dan RM 1.5 juta masing-masing, merupakan peningkatan yang amat ketara. Tambahan lagi, mereka yang sudah mendapat kelulusan MM2H sebelum ini terpaksa memenuhi kriteria baharu dalam masa setahun. Ini menjejaskan perancangan persaraan dan secara tidak langsung memaksa mereka menjual aset dan meninggalkan Malaysia.

Saya minta Yang Berhormat Menteri menjelaskan apa rasional kerajaan membuat perubahan yang begitu ketara atas kriteria permohonan serta mengapa tidak polisi baharu hanya dikenakan ke atas permohonan baharu dan tidak dikenakan kepada kelulusan yang telah diberi sebelum ini.

Perubahan yang kurang munasabah menjejaskan hasrat Program MM2H serta mengurangkan keyakinan pelabur asing ke atas polisi yang akan dilaksanakan

oleh Malaysia pada masa hadapan. Saya minta Yang Berhormat Menteri nyatakan berapa kelulusan sedia ada dan masih dalam permohonan serta negara asal permohonan berkenaan. Saya minta Yang Berhormat Menteri menyatakan juga berdasarkan syarat pendapatan, simpanan dan aset yang baharu, berapakah kelulusan MM2H yang sedia ada memenuhi syarat tersebut dan beberapa yang perlu membuat penambahan (*top-up*) untuk memenuhi syarat tersebut. Sekian, terima kasih.

2.36 ptg.

Timbalan Menteri Dalam Negeri I [Dato' Sri Dr. Haji Ismail bin Haji Mohamed Said]: Terima kasih Tuan Yang di-Pertua. terima kasih kepada rakan saya, Yang Berhormat Alor Setar. Tuan Yang di-Pertua, untuk makluman Ahli Yang Berhormat, Program Malaysia Rumah Keduaku (MM2H) yang pada awalnya dikenali sebagai Program Silver Hair telah dijenamakan semula kepada Program MM2H pada tahun 2002.

Sepanjang 19 tahun pelaksanaan program ini, dasar dan syarat-syarat berkaitan Program MM2H tidak pernah dikaji semula atau dibuat penilaian secara berkala. Oleh yang demikian, syarat kelayakan sedia ada dilihat sudah tidak relevan dan realistik sebagai asas atau nilai pelaburan terbaik untuk menarik warga asing khususnya yang berkualiti dalam menjana pertumbuhan ekonomi negara.

Perubahan dasar Program Malaysia Rumah Keduaku (MM2H) tidak dilaksanakan secara drastik kerana penilaian awal telah dibuat sejak tahun 2019 lagi dan turut melibatkan beberapa kementerian atau agensi yang berkepentingan. Sepanjang program ini dibekukan pelaksanaannya pada tahun 2020, susulan daripada keputusan kerajaan untuk melaksanakan dasar penutupan sempadan negara, Kementerian Dalam Negeri dan Kementerian Pelancongan, Seni dan Budaya telah meneliti semula dasar dan syarat-syarat berkenaan program ini sebelum mengumumkan pengaktifan semula program MM2H.

Terkini, kerajaan telah bersetuju untuk penambahbaikan dasar baharu Program MM2H sebagai salah satu strategi untuk membantu pelaksanaan Program Pemulihan Negara (PPN) bagi menjana semula ekonomi negara. Sehubungan itu, sepertimana yang telah diumumkan dalam sidang media yang diadakan pada 11 Ogos yang lepas, Program MM2H akan diaktifkan semula dan permohonan baharu akan diproses serta dikendalikan oleh Jabatan Imigresen Malaysia mulai Oktober 2021, iaitu setelah semua proses berkaitan perundangan selesai.

Tuan Yang di-Pertua, untuk makluman Ahli Yang Berhormat, Yang Berhormat Menteri Dalam Negeri semasa sidang media beliau, pada 1 September

2021 dan semasa sesi *Ministerial Question Time* (MQT) pada 14 September 2021, telah memberikan jaminan kepada peserta-peserta MM2H sedia ada untuk dipertimbangkan kelonggaran daripada memenuhi dasar semasa. Walau bagaimanapun, bagi semua peserta baharu, mereka perlu memenuhi dasar baharu MM2H ini bagi memastikan peserta MM2H yang berada di Malaysia adalah benar-benar *genuine*, berkualiti tinggi dan dapat memberi sumbangan yang positif kepada pertumbuhan ekonomi negara.

Selanjutnya, merujuk kepada kenyataan Ahli Yang Berhormat bahawa perubahan yang kurang munasabah menjejaskan hasrat program MM2H serta mengurangkan keyakinan pelabur asing ke atas polisi yang akan dilaksanakan oleh Malaysia pada masa hadapan adalah tidak tepat. Ini kerana, sepertimana yang telah diperjelaskan oleh Yang Berhormat Menteri Dalam Negeri dalam sesi *Ministerial Question Time* (MQT) pada 14 September 2021, mereka yang datang dengan membawa *investment* sebagai *investors* melibatkan program lain yang berbeza dengan Program MM2H.

Merujuk permohonan butiran oleh Ahli Yang Berhormat mengenai beberapa kelulusan sedia ada dan masih dalam permohonan serta negara asal permohonan berkenaan, sehingga 31 Ogos 2021, pemegang pas aktif adalah seramai 56,612 orang termasuk tanggungan yang dibawa oleh pemegang pas MM2H. Warganegara Cina merupakan majoriti pemegang pas aktif dengan jumlah seramai 23,898 orang, diikuti oleh warganegara Republik Korea iaitu 5,273 orang dan warganegara Jepun iaitu 5,732 orang.

Selanjutnya, merujuk permohonan Ahli Yang Berhormat mengenai kelulusan permohonan yang diterima berdasarkan syarat-syarat penyertaan baharu dan beberapa peserta yang perlu membuat penambahan (*top up*) untuk memenuhi syarat baharu tidak dapat dibekalkan memandangkan Program MM2H hanya akan diaktifkan semula pada bulan Oktober 2021. Terima kasih, Tuan Yang di-Pertua. Terima kasih Yang Berhormat.

Peruntukan untuk Pembangunan dan Naik Taraf Hospital Besar Pulau Pinang

2.41 ptg.

Tuan Wong Hon Wai [Bukit Bendera]: Terima kasih Tuan Yang di-Pertua. Pada kesempatan petang ini, izinkan saya membangkitkan isu yang berkaitan dengan fasiliti Hospital Besar Pulau Pinang.

Hospital Besar Pulau Pinang terletak di kawasan Parlimen Bukit Bendera dan merupakan hospital yang terpenting di negeri Pulau Pinang dan memberikan perkhidmatan perubatan bukan sahaja kepada penduduk-penduduk sekitar tetapi kepada penduduk Pulau Pinang.

Oleh itu, adalah penting untuk sentiasa untuk naik taraf dan membangunkan fasiliti perubatan untuk memastikan kebajikan pesakit dapat dijaga dan pengamal perubatan dapat memberikan perkhidmatan terbaik menggunakan teknologi terkini di bawah persekitaran yang bersesuaian. Lebih-lebih lagi, pandemik COVID-19 juga menuntut supaya kita melihat semula logistik dan menambah baik fasiliti *Intensive Care Unit* (ICU).

Oleh itu, saya ingin meminta Yang Berhormat Menteri menyatakan secara terperinci status projek-projek naik taraf dan pembangunan Hospital Besar Pulau Pinang iaitu:

- (i) projek blok baharu untuk perkhidmatan *stem cell*;
- (ii) Blok Wanita dan Kanak-kanak;
- (iii) kuarters hospital; dan
- (iv) Blok Klinik Pakar dan Wad hospital.

Saya ingin meminta juga maklumat bilangan katil ICU untuk Hospital Besar Pulau Pinang. Sebelum ini, Kerajaan Negeri Pulau Pinang pernah menawarkan tanah dan kewangan pada tahun 2020 untuk membina lebih banyak fasiliti ICU. Apakah maklum balas kementerian berkenaan cadangan kerajaan negeri? Itu sahaja ucapan saya. Terima kasih Tuan Yang di-Pertua.

2.43 ptg.

Timbalan Menteri Kesihatan I [Dato' Dr. Haji Noor Azmi bin Ghazali]: Terima kasih Tuan Yang di-Pertua dan Yang Berhormat Bukit Bendera.

Tuan Yang di-Pertua, Kementerian Kesihatan Malaysia (KKM) sentiasa berusaha untuk menambah baik sistem perkhidmatan kesihatan demi kesejahteraan rakyat. Berhubung Hospital Pulau Pinang yang merupakan hospital negeri, pihak kerajaan telah pun meluluskan empat buah projek.

Daripada jumlah ini, dua projek telah pun dimulakan pembinaannya iaitu Blok Wanita dan Kanak-kanak dan blok kuarters. Selain itu, dua projek lagi berada dalam fasa prapelaksanaan iaitu blok baharu Pusat Perkhidmatan *Stem Cell* serta Blok Klinik Pakar dan Wad.

Kedudukan semasa keempat-empat projek ini adalah seperti berikut:

- (i) Blok kuarters. Projek ini yang melibatkan pembinaan 204 unit kuarters telah bermula pada 31 Mac 2021 dan dijadualkan siap pada bulan September 2023. Hingga 31 Ogos 2021, projek ini mendahului jadual dan kemajuan fizikal sebenar ialah 4.40 peratus berbanding jadual perancangan 4.12 peratus;
- (ii) Blok Wanita dan Kanak-Kanak. Projek ini yang melibatkan pembinaan sebuah blok baharu dengan kapasiti 329 katil telah bermula pada 22 Disember 2020 dan dijadualkan siap pada bulan Disember 2024. Kemajuan fizikal sebenar hingga 31 Ogos 2021 ialah 9.59 peratus berbanding jadual perancangan 10.48 peratus;
- (iii) Blok baharu Pusat Perkhidmatan *Stem Cell*. Projek ini melibatkan pembinaan sebuah blok baharu bagi menempatkan fasiliti perkhidmatan *stem cell*. Projek ini telah melalui proses prakelayakan pada 15 Mei 2021 dan pelawaan tender telah dikeluarkan pada 13 Julai 2021; dan
- (iv) Blok Klinik Pakar dan Wad. Projek ini melibatkan pembinaan blok baharu yang menempatkan klinik pakar serta wad dengan kapasiti 216 katil. Status projek masih di peringkat perancangan dan dijadualkan untuk ditender pada bulan Januari 2022.

Tuan Yang di-Pertua, berhubung katil ICU di Hospital Pulau Pinang, KKM telah pun meningkatkan bilangan katil daripada 40 buah kepada 66 buah. Selain itu, KKM ingin mengatakan bahawa KKM tidak pernah menerima tawaran tanah dan kewangan oleh Kerajaan Negeri Pulau Pinang pada tahun 2020 untuk membina lebih banyak fasiliti ICU di Hospital Pulau Pinang.

Terima kasih, Tuan Yang di-Pertua. Terima kasih, Yang Berhormat Bukit Bendera. *Assalamualaikum*.

Timbalan Yang di-Pertua [Dato' Mohd Rashid Hasnon]: Terima kasih, Yang Berhormat Timbalan Menteri Kesihatan. Ahli-ahli Yang Berhormat, Mesyuarat Kamar Khas ini ditangguhkan sehingga jam 2.30 petang, Khamis, 23 September 2021. Terima kasih Ahli-ahli Yang Berhormat.

[Kamar Khas ditangguhkan pada pukul 2.46 petang]